

Bouôn Appétit!

Bouônjour mes bouonnes gens. Ch'est Clive Jones tch' a l' pliaîsi d' vouos pâler aniet. Lé 3 d'Févri 2024.

Savi'-ous qu'i' y' a eune nouvelle exhibition mouontréthie au Mûsée d' Jèrri ? Ch'na s'appelle « Bouôn Appétit » et èrconte l'histouaithe dé not' nouôrritthe. Bein seux l'île, auve ses côtis endrait l' Sud, est idéale pour l'agritchultthe. Lé doux goût d'la souaille dé nos patates rouoyales, lé crémeux lait d' nos vaques dé Jèrri et l' fort goût des bêtes à êcales font touos partie d' not' unnique nouôrritthe.

Savi'-ous qu'i' y' a 6500 ans les gens néolithiques rîlyiaient lus grains et avaient des vaques et des brébis ? Nou peut vaie au mûsée un « quern » - eune meule à bras – ch'est-à-dithe eune pierre comme un pliat où'est qu'i' soulaient meuler lus grains.

En 1682, Jean Podêtre èrcordit l'existence de trente moulins à ieau pus quatre ou chîn moulins à brais ou à foulon.

Savi'-ous qu' la vaque dé Jèrri fut èrconnue comme eune race unnique en 1700, mais ch'nna n' fut qu'auprés l'élevage sélectif à Messire John Lé Couteur qu'nou vit l' bel annima d'aniet.

Ch'tait en 1866 qu' nou-s-êcrivit lé Livre du Troupé d' Jèrri où'est qu' nou r'cordit lé nom dé châque vaque dé Jèrri née dans l'île, c'menchant avec un boeu nommé « Dandy » et eune vaque nommée « Daisy ».

Savi'-ous qué raiqu' un seigneur avait l' drouait d'aver un colombyi ? Duthant l'Hivé i' pouvait mangi d's oeux et d'la viande autant qu'i' voulait, mais duthant l'Été ch'tait ses pigeons tchi mangeaient l' grain d' ses sujets !

Tch'est qu'les gens d' Jèrri mangeaient d'avant l'arrivée d' not' Rouoyale Jèrriaise ? Sustout lus pannais et lus pain, ch'est chein qu' nou crait. Les patates soulaient nouôrri l's animaux !

En 1878, Hugh De La Haye vit dans la d'avantthe de M. Le Caudey, marchand d' grains, eune grosse patate auve douze ièrs. l' copit la patate en douze morcieaux, châtchun auve un yi et en donnit tchiques uns à ses anmîns et i' pliantit tchiques uns dans son propre côti à Bellozanne. Lé résultat fut eune petite patate auve la forme d'un rein et auve un hardi bouôn goût. Ch'tait la Rouoyale Jèrriaise tchi d'vînt iun d' nos pus fanmeux exports.

À propos, connaîtss'-ous la connexion entre M. Le Caudey et « Buffalo Bill » ? Eune intéressante histouaithe !

Ch'est facile à oublier qué, dans la preunmié maîntchie du vîngtchième siècl'ye, les tonmates dé Jèrri 'taient iun des p'ncipaux exports dé l'île. Nou peut vaie eune carte – hardi artistiquement peinte – tchi montre les exports dé 1946 à 1954 pour la Douanne.

D'avant l'arrivée d'la nouôrritthe tchi 'tait prête à mangi ou tchi n'avait pon besoin d' trop d' couqu'thie la routine quôtidienne d'eune bouonnefemme încliuait la traite des vaques, la faîs'sie du beurre, la fouôgnéthie du pain, et la graiethie des r'pas. Duthant lé S'tembre ou pâssait pus d' temps à faithe la graiethie des r'pas pour l'Hivé.

Y' a un exempl'ye d'eune « Hedge Veg » stâle où'est qu' les pâssants peuvent prendre les produits du fèrmyi, des lédgeumnes ou des oeux, en laîssant les sou dans la tinne. Ch'est un système tchi s'fie sus l'honnêteté des bouonnes gens et tchi fonctionne assez bein.

Dans l's années chînquante Jèrri 'tait « L'île des leunes dé myi » eune destinâtion d'sithabl'ye pour les jannes coupl'yes tchi 'taient nouvellement mathiés. Pour les sèrvi, des nouveaux restaurants émergient et i' y' eut eune louême d'înmigrâtion sustout d's Italiens. Tchiques-uns sont tréjous là, parmi ieux lé douoyen Tino Rossi dé 'La Capanina'. I' y' a eune entréveue auve Tino dans l'exhibition. Ma bouonnefemme et mé ont 'té învités à eune préveue d' l'exhibition et auprès à un dîner à... 'La Capanina'. J' dis à Tino qué j'avais jouie d' lé vaie dans l'exhibition. « Oui » qu'i' r'ponnit sombrément, « J' sis dév'nu enfin eune pièche dans l' mûsée. »

Ch'est eune exhibition hardi intéressante avec un tas d'tchi à vaie et à liéthe. Allez-y mes bouonnes gens !